

tamento competente en materia de modernización e innovación tecnolóxica».

As letras d), e), f) e g) existentes pasan a identificarse coas letras e), f), g) e i) respectivamente.

4. O artigo 12.1º pasa a ter a seguinte redacción:

«1. O pleno estará formado polas persoas que desempeñan a presidencia, as tres vicepresidencias, a secretaría e a totalidade de vogais que figuran no artigo 7º deste decreto».

5. Modifícase o artigo 13 nos seus puntos 2 e 3, que quedan redactados como se indica a continuación:

«2. As comisións de traballo serán presididas polas persoas expertas relacionadas nas letras e), f), g) e h) do artigo 7º, formando parte delas un mínimo de dous vogais do pleno.

3. Os departamentos competentes en materia de igualdade, educación e ordenación universitaria, innovación e industria e modernización e innovación tecnolóxica proporcionarán o persoal de apoio necesario para o funcionamento destas comisións».

#### *Disposición derradeira*

Única.-Este decreto entrará en vigor o día seguinte ao da súa publicación no *Diario Oficial de Galicia*.

Santiago de Compostela, dez de xuño de dous mil dez.

Alberto Núñez Feijóo  
Presidente

Alfonso Rueda Valenzuela  
Conselleiro de Presidencia, Administracións Públicas e Xustiza

## CONSELLERÍA DO MAR

*Orde do 16 de xuño de 2010 pola que se modifica a Orde do 5 de xuño de 2008, pola que se regula a captura e desembarque de determinadas especies peláxicas.*

A Lei 11/2008, do 3 de decembro, de pesca de Galicia, modificada pola Lei 6/2009, do 11 de decembro establece no seu artigo 7 que lle corresponde á consellería competente en materia de pesca, logo da audiencia do sector, a adopción das seguintes medidas: «d) Regulación directa do esforzo de pesca e marisqueo coa limitación da capacidade de pesca ou do tempo de actividade» e «f) A regulación indirecta do esforzo de pesca e marisqueo coa limitación do volume de capturas».

A Orde do 5 de xuño de 2008 pola que se regula a captura e o desembarque de determinadas especies peláxicas establece no seu artigo 2 un tope máximo diario de xarda (*Scomber scombrus*) de 1.500 kg tripulante/día para os buques de cerco, así mesmo no seu artigo

3 establece un tope máximo diario de xarda de 1.000 kg tripulante/día, para os buques de artes menores.

Do mesmo xeito a Orde ARM/2091/2008, do 8 de xullo, pola que se regulan as capturas e desembarques de xarda do Caladoiro Nacional do Cantábrico e Noroeste, no artigo 2 relativo ao volume de capturas e desembarques diarios, establece o tope máximo do volume de capturas para a modalidade de cerco, no artigo 2 b) en 1.500 kg/tripulante embarcado e para as artes menores de anzó e restos das modalidades pequeiras, artigo 2 c) en 1.500 kg/tripulante embarcado.

A Orde ARM/271/2010, do 10 de febreiro, pola que se establecen os criterios para a repartición e a xestión das cotas de xarda e se regula a súa captura e desembarque, establece no seu artigo 3.1.2º b) que a porcentaxe da cota do *stock* de xarda (*Scomber scombrus*, 8C3411) de que pode dispoñer a frota de cerco é 27,73%, do cal un 7% (é dicir, 476 toneladas para 2010) se destinará aos buques desta modalidade, con arqueo igual ou inferior a 50 GT, para as capturas de xarda que se realicen durante o segundo semestre de cada ano.

A Orde ARM/1054/2010, do 23 de abril, pola que se modifica a Orde ARM/271/2010, do 10 de febreiro, pola que se establecen os criterios para a repartición e a xestión da cota de xarda e se regula a súa captura, establece que o volume de capturas de xarda para os buques de cerco pertencentes ao Cantábrico-Noroeste con arqueo igual ou inferior a 50 GT, queda establecido para o segundo semestre do ano 2010 en 700 kg por buque e día, así mesmo que a cota adicional de xarda de que dispón España no 2010 conseguida a través dun intercambio con outro Estado membro, se destinará unicamente aos buques do caladoiro Cantábrico-Noroeste pertencentes a outras artes distintas do arrastre de fondo ou cerco, e que o volume de captura desta especie, por buque e marea, non poderá exceder o 10% do total desembarcado en cada marea.

Dado que os topes de xarda establecidos para as frotas de cerco e artes menores na Orde do 5 de xuño de 2008 antes mencionada é moi superior aos límites marcados na Orde ARM/1054/2010 do 23 de abril, cómpre modificar a mencionada orde para adecuar os topes de captura nela establecidos e así manter os mesmos criterios de volume de capturas tanto para augas exteriores coma interiores.

Por todo o anterior, logo da consulta co sector afectado, por proposta da Dirección Xeral de Ordenación e Xestión dos Recursos Mariños da Consellería do Mar,

#### *DISPOÑO:*

Artigo único.-Modificación da Orde do 5 de xuño de 2008 pola que se regula a captura e o desembarque de determinadas especies peláxicas.

A Orde do 5 de xuño de 2008 pola que se regula a captura e o desembarque de determinadas especies peláxicas queda como segue:

Un. Artigo 2º.-*Volume de desembarques diarios para o cerco.*

1º Os buques ateranse no volume de desembarques aos seguintes topes máximos diarios, respectando, en todo caso, os totais admisibles de capturas (TAC) e cotas establecidas:

Sardiña (*Sardina pilchardus*): 7.000 kg/embarcación/día.

Parrocha (sardiña de 11 a 15 cm de talla): 2.000 kg/embarcación/día.

Xurelo (*Trachurus trachurus*): 6.000 kg/embarcación/día.

Xarda (*Scomber scombrus*): buques con arqueado igual ou inferior a 50 GT, queda establecido para o segundo semestre do ano 2010 en 700 kg/embarcación/día.

Mestura de varias das especies anteriores: enténdese por mestura cando a especie máis abundante non supere o 80% do total das capturas (a xarda non pode computar nesta epígrafe), 10.000 kg/embarcación/día.

Os límites diarios establecidos no punto anterior deben considerarse referidos ás capturas obtidas en xornadas de pesca contados por días naturais.

Dous. Artigo 3º.-*Volume de desembarques diarios para artes menores.*

Os buques ateranse en relación ao volume dos seus desembarques, aos seguintes topes máximo diarios respectando, en todo caso, os totais admisibles de capturas (TAC) e cotas establecidas:

Xarda (*Scomber scombrus*): o volume de capturas por embarcación e marea, non poderá exceder do 10% do total desembarcado en cada marea.

Os límites diarios establecidos no punto anterior deben considerarse referidos ás capturas obtidas en xornadas de pescas contadas por días naturais.

Tres. Artigo 7º.-*Tamaños mínimos de xurelo.*

De acordo co establecido no Regulamento (UE) nº 53/2010 do Consello, do 14 de xaneiro de 2010, polo que se establecen, para o 2010, as posibilidades de pesca para determinadas poboacións e grupos de poboacións de peixes aplicables en augas da UE, e nas demais augas onde sexa necesario establecer limitacións de capturas, no caso do xurelo (*Trachurus spp*) admitírase un 5% en peso e en cómputo total, con tamaño comprendido entre os 12 e 14,99 cm. Ao ser a cota de xurelo asignada a España para o 2010 nas divisións CIEM VIIIc e IX de 30.733 toneladas, a cantidade total admitida de xurelo de tamaño comprendido entre 12 e 14,99 cm, é de 1.536,65 toneladas. Para os efectos de control desta cantidade, aplicarase o coeficiente 1,2 ao peso dos desembarques.

Para os efectos de control e xestión desta cota, as correspondentes federacións provinciais de confrarías de pescadores remitiranlle á Dirección Xeral de

Ordenación e Xestión dos Recursos Mariños, antes do día 15 de cada mes, a información relativa ás cantidades de xurelo de tamaño comprendido entre 12 e 14,99 cm capturado no mes anterior.

#### *Disposicións derradeiras*

Primeira.-Facúlase a persoa titular da Dirección Xeral de Ordenación e Xestión dos Recursos Mariños para ditar as disposicións necesarias para o desenvolvemento e a aplicación desta orde.

Segunda.-Esta orde entrará en vigor o día seguinte ao da súa publicación no *Diario Oficial de Galicia*.

Santiago de Compostela, 16 de xuño de 2010.

Rosa María Quintana Carballo  
Conselleira do Mar

### III. OUTRAS DISPOSICIÓNS

#### CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA

*Orde do 18 de xuño de 2010 pola que se convocan, en réxime de concorrencia competitiva, axudas aos concellos de Galicia para o apoio á policía local, consistentes na cesión en propiedade de vehículos especialmente preparados para o exercicio das súas funcións.*

A Lei 7/1985, do 2 de abril, reguladora das bases do réxime local, modificada pola Lei 11/1999, do 21 de abril, e a Lei 5/1997, do 22 de xullo, de Administración local de Galicia, determinan que os concellos exercerán competencias, entre outras, en materia de seguridade en lugares públicos.

Así mesmo, a Lei orgánica 2/1986, do 13 de marzo, de forzas e corpos de seguridade, posibilitou unha ampliación de competencias en favor da Comunidade Autónoma de Galicia en materias non previstas no seu Estatuto de autonomía, entre outras, a coordinación de policía locais.

Na súa consecuencia, e por medio da Lei 4/2007, do 20 de abril, de coordinación de policía locais, a comunidade autónoma procedeu á coordinación das policía locais do seu territorio, nos termos establecidos no artigo 39 da Lei orgánica de forzas e corpos de seguridade.